

**Date – 13/10/2025**

**Time - 7:30 -7:40 Hrs**

**AKASHVANI AIZAWL**  
**REGIONAL NEWS BULLETIN**  
**HEADLINES (MORNING)**

1. Agriculture & Farmers' Welfare minister Pu PC Vanlalruata chuan Thingtam tuarte tanpuina pek dan a awm theih beisei a ni a ti.
2. Kolasib district a lirthei hmanga eizawng pawl ten Vairengte leh Sairang kawng chhe lutuk sorkar in tun thla ni 19 thlenga an la siamthat loh chuan he lai kawnga tlan tawh loh an tum thu an puang a, vawiin hian pawl dangin an zawm ve dawn em tih an ngaihtuah ang.
3. Bihar Assembly inthlan lo awm turah NDA te chuan Assembly seat an insem dan tur an puang thei ta.
4. Vawiin atangin Gaza-a indonan titawp turin International Peace Summit Egypt ah neih a ni dawn.

<><><>

## CROP INSURANCE

Agriculture & Farmers' Welfare minister Pu PC Vanlalruata chuan Thingtam tuarte tanpuina pek dan a awm theih beisei a ni a ti.

Akashvani Aizawl zawhna chhangin Pu PC Vanlalruata chuan Disaster Management & Rehabilitation Department-ah Thingtam avanga chhiatna leh tawrhna hi Mizoram chhunga chhiatna thlang bik (State Disaster Specific) a puang tura ngen a ni a. Hei hi tihpuitlin a nih chuan sazu puan avanga an buh leh bal leh thlai chantute hi tanpuina pek dan a awm theih a rinawm a ti a ni.

Minister chuan rawthing tam avanga sazu puang tirem tur hian sazu tur hmanga sazu hrai leh thang hmanga man hna thawh chhoh zel a nih thu a sawi a. Khaw hrang hrang, zazu puanna-ah te chuan Agriculture department hnathawkte leh kuthnathawktu tangrualte chuan sazu hrai hna hi an thawk mek reng a ni, a ti.

Kan corr report lo ngaithla ang.

VC

*Thingtam lo thlang hian district 11-a khaw 130 vela loneitu mi 4,000 vel thlawhma chu sazu puangin a tichhe nasa hle a. Thlawhma lakna ram hectare 6,869 chuanga hectare 1,737 velah sazu hian buh leh thlai a seh a. Tai (buh thar-rang) leh buhpui an seh nasat ber laiin vaimim, fu, behlawi, sawhthing, bawkbawn, hmarcha, mai, chhawahchhi leh fanghma te an tichhe tel bawk a ni. Sazu tur hi Bromadiolone leh Zinc Phosphide te an hmang ber a, chuti chungin district thenkhatah chuan duh khawp hman tur a awm lo ni a sawi a ni a. Hei bakah hian sazu thahna atana Mizote'n an hman tlanglawn sairawkherh bakah thang chi hrang hrang - vaithang, mangkhawng leh thangchep te hman a ni bawk a. Agriculture department hnathawkte chuan sazu-in an hriat theih loh na'n thang chi hrang hrangte hi hman thlak thin turin kuthnathawktute an zirtir a ni.*

Hetihlai hian, Agriculture Minister chuan kuthnathawktute buh leh bal leh thlai chin insurance tihsak a ni dawn tih sawiin, Thingtam tuar mekte erawh chuan insurance hi an hmang tangkai

hman dawn lo a ni a ti a. 'Crop insurance' titu tura tender koh a nih thu leh a chhang hniam ber chu Zirtawpni khan thlan fel a nih thu a sawi a. Insurance atana pawisa chawi ngai (premium) hi sorkarin za zela 90 tumsakin kuthnathawktute'n za zela 10 an tum ve dawn a ni a ti a. Crop insurance hi chinfel chhung hun a duh avangin kumina sazu puangin an buh leh bal a ei chhiatsakte'n an hmang tangkai hman dawnin a lang lova ni a ti bawk.



## **BHARAT SERIES**

Transport department chuan ram puma lirthei registration hman tawm theih Bharat Series (BS) number 139 an pechhuak tawh.

Akashvani zawhna chhangin Transport department hotute chuan Ministry of Road Transport and Highways in kum 2021 August ni 26 khan thuchhuah siamin BS number chu chumi kum vek, September Ni 15 atanga hman tan tur a nih thu an tarlang tih an sawi a. Mizoramah chuan BS number an pekchhuah hmasak ber chu kum 2022 September Ni 1-ah a nih thu an sawi a. A diltu nazawng pek an nih loh thu leh Rule 47 of the Central Motor Vehicle Rules, 1989 in a phut ang documents nei te chu Bharat Series number pek theih an nih thu leh chung mite chauh chu pek thin an nih thu an sawi a ni.

BS number pekchhuah thin te hi a tlangpuiin sorkar leh private hnuaia India ram hmun hrang hranga hna avanga kal kual reng te an nih deuh ber thu transport department hotute chuan an sawi a. Mizoramah pawh diltu tam tak an awm tawh laiin danin a phal anga pekchhuah te chu mi 139 an nih tawh thu an sawi a. State khat tana register lirtheite chu dan angin hmundanga thla 12 aia tam a awm a nih chuan a lirthei awmna state-ah register that leh tur a nih thu an sawi a. Hetiang lak atanga an fihlima harsatna awm loa khawi hmunah pawh an lirthei an tlantir theih nan danin a pawmsak chin BS number nei thei te chu pek thin an nih thu an sawi a ni.



## TRUCKERS

Kolasib district a lirthei hmanga eizawng pawl hrang hrangte chuan Vairengte leh Sairang leh Kolasib leh Bairabi inkar kawng chhe lutuk chu sorkar thuneitute'n October ni 19 thlenga an la siamthat loh chuan he lai kawnga tlan tawh loh an tum.

Mizoram Tipper Association (MTA) Kolasib district leh Kolasib District Drivers' & Owners' Joint Action Committee te chuan Inrinni khan thu an chhuah a. Chu tah chuan Mizoram chaklakna ber Vairengte leh Sairang inkar leh Kolasib leh Bairabi inkar kawngpuite chu lirthei tana zawh hlauhawm khawpa chhia, vanduaina thleng thei a ni, an ti a. Lirthei khalhtute'n harsatna namen lo an tawk mek niin an sawi. He lai kawng pawimawh tak hi siamtha thuai turin ziakin Kolasib bawrhsap hnenah Inrinni khan an thlen a, a copy hi Kolasib district SP leh Kolasib a National Highway Division EE te an pe bawk a. Lehkha-ah chuan tun leh October ni 19 inkar chhunga kawngpuite hi siam that a nih loh chuan an lirtheite an tlan tawh dawn loh tur thu an ziak a ni. Kar kal ta lama ruah sur nasa avang khan he lai kawng chhe tawh sa hi a chhe leh zual hle a. Lirthei tlu leh tang a tam hle ni a thudawn a ni.

He tih lai hian nimin lam khan Kawnpui atanga Aizawl lam pan lirthei 578 chhuah a ni a, Sairang peng leh Mualkhang/Kamrang inkar atanga phai lam kal tur chhuah a awm lova. Khamrang-ah phai lam pan tur lirthei 263 a tangkhang mek a, Aizawl lam pan tangkhang a awm lo. Mizoram Truck Drivers' Association (MTDA) hruaitute sawi dan chuan kar kalta laihawl vela ruahsur avang khan Sairang leh Kawnpui inkar kawng chhia lutuk hi a nal zual hle a. Truck ruak thenkhat kal thei lovin tlu leh kawng nala tang an awm tam hle a ni.

MTDA president Pu H Laldingliana chuan vawiin hian an pawl hruaitute an inhmuhkhawm tur thu a sawi a. Tun hnai a kawngpui dinhmun an enin a chhiat leh nasat tawhzia an zu hmu tih a sawi a. Kolasib a lirthei a eizawng pawl pahnihte thutlukna hi an zawmpui ve leh ve loh tur chu vawiinah thutlukna an siam dawn thu leh hetiang thilah chuan tan rual zel ni se tih chu a thuphunga thu dah a awm thu a sawi a ni.



## **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



## BIHAR

Bihar Assembly inthlan lo awm turah NDA te chuan Assembly seat an insem dan tur an puang thei ta a. BJP leh JDU te seat 101 ve ve ah an ding ang a, LJP (Ram Vilas) ten MLA bial 29 leh HAM ten bial 6 an chang thung ang. BJP hruaitute leh an thawhpui Political Party te New Delhi-a an inhmukhawm hnuah he thu hi puan a ni a. Kum 2020 Bihar Assembly inthlanah khan BJP chuan seat 110 chuhin Janata Dal ten seat 105 an chuh a. Heng zingah hian BJP te seat 74 ah thlan tlin an ni a. Chirag Paswan-a kaihhruai Lok Janshakti Party erawh chuan independent in an chuh thung a. JD(U) te seat 43 ah chauh thlan tlin an ni thung a ni.

Hetihlai hian opposition lam Grand Alliane te chuan Bihar Assembly inthlan atan hian seat insem dan turah inremna an la nei thei lo a ni.



## **PB CHAIRMAN**

Prasar Bharati Chairman Dr. Navneet Kumar Sehgal chuan India eibar dinhmun chu nasa taka thangin khawvel ramdang zah pawh a kai tawh hle a ti. Nimina ICAI Member in Public Service Residential Meet,Goa-a neihah he thu hi sawiin Dr.Sehgal-a chuan Idnia chu chak taka thangin zaa 6.8 atanga zaa 7 in a thang mek a ti a. Hei hi khawvel ram lian zingah tluk pha an awm lo tih a sawi a ni.



## PEACE SUMMIT

Vawiin atangin Gaza-a indonan titawp turin International Peace Summit Egypt ah neih a ni dawn. He hunah hian US President Donald Trump leh Egypt President Abdel Fattah el-Sisi te chuan inhmukhawm hi an kaihruai dawn a. Ram 20 atangin hruaitute an kalkhawm dawn a. Gaza indona titawp tura inremna an siam dawn a ni. Ram hruaitu kal tur zingah hian UK Prime Minister Keri Starmer leh UN Secretary-General Antonio Guterres te pawh an tel a. Asia khawthlang lama remna leh muanna siam tur leh hun thar tha zawk din turin an inhmukhawm dawn a ni.

